

**Inatsisartut inatsisaat nr. xx xx. xxx 2021-imeersoq Nuummi Qasigiannguani Aasiannilu
erngup nukinganik nukissiorfissat taakkununngalu atortussat
aninggaasalersorneqarnissaannut ingerlanneqarnissaannullu sinaakkusersuutit**

*Nunalerinermut, Imminut Pilersornermut, Nukissiutinut Avatangiisinullu Naalakkersuisumit
saqqummiunneqartoq*

pillugu

Inuussutissarsiornermut Aatsitassanullu Ataatsimiitaliap

siunnersuutit aappassaaneerneqarnerannut

ISUMALIUTISSISSIONTAA

Inuussutissarsiornermut Aatsitassanullu Ataatsimiitaliap suliarinninnermini ilaasortarai:

Inatsisartunut ilaasortaq Marianne Paviassen, Inuit Ataqatigiit, siulittaasooq

Inatsisartunut ilaasortaq Lars Poulsen, Siumut, siulittaasup tullia

Inatsisartunut ilaasortaq Knud Mathiassen, Inuit Ataqatigiit

Inatsisartunut ilaasortaq Harald Bianco, Inuit Ataqatigiit

Inatsisartunut ilaasortaq Charlotte Pike, Inuit Ataqatidiit

Inatsisartunut ilaasortaq Aslak Wilhelm Jensen, Siumut

Inatsisartunut ilaasortaq Karl Tobiassen, Siumut

UKA2021-mi ulloq 5. oktobarimi siullermeerinninnerup kingorna ataatsimiitaliap siunnersuut misissorpaa.

Siunnersuutip imarisaa siunertaalu

Siunnersuummut tunuliaqutaasoq:

Nukissiuuteqarnermut Imermillu Pilersuinermut Immikkoortumut Pilersaarut, 2017-imi novembarimi akuerineqartoq, Naalakkersuisunit tikkuarneqarpoq, tamatumani immikkoortumut pilersaarummi anguniakkat pingarnerit tassaallutik nukimmik pilersuinikkut aaqqissuussinerit nutarterneqarnissaat, aamma nukissiuutinik piujuannartitsinermik tunngavilinnik sumi tamani tamatumunnga periarfissaqarfiusuni atuilernissaq. Tamanna tunngavigalugu Qasigiannguit aamma Aasiaat erngup nukinganik iluaquteqarnikkut pilersorneqalernissaannut kiisalu Utoqqarmiut Kangerluarsunnguanni erngup nukinganik nukissiorfiup Nuummut pilersuisup allineqarnissaanut aalajangiinissamut tunngavissap pilersinneqarnissaa ukiuni arlaqartuni sulissutigineqarsimavoq.

Qasigiannguit aamma Aasiaat erngup nukinganik iluaquteqarluni nukissiorfimmit pilersorneqalernissaasa kiisalu erngup nukinganik iluaquteqarluni Nuup nukimmik pilersorneqarnerata annertusineqarnissaata sulissutiginissaanut Naalakkersuisut peqquneqarnissaat pillugu siunnersuut Inatsisartunit 2019-imi ukiakkut ataatsimiinnermi akuersissutigineqarpoq (UKA 2019/153).

Taamani Sanaartornermut Ataatsimiititaliaasup isumaliutissiisummini ilaatigut allappaa Naalakkersuisut erngup nukinganik nukissiorfiliassanut atatillugu ilutsip toqqarneqartup naammassineqarnissaanut sanaartornissamut, ingerlatsinissamut aamma aningaasalersuinissamut inatsisiliornissat pisariaqartut aallartissagaat.

Siunnersummi immikkoortut pingaarcerit:

Sanaartorneq aamma erngup nukinganik iluaquteqarluni nukissiorfimmik pioreersumik taakkununngalu atortulersuutinik allilerineq:

Nuummi kiisalu Qasigiannguani Aasiannilu pilersuinissamut erngup nukinganik nukissiorfiit taakkununngalu atortulersuutit sanaartornissaannut, aningaasalersornissaannut ingerlanneqarnissaannullu killiliussatut piumasaqaatit Inatsisartut inatsisaanni aalajangersarneqarput.

§§-ini 2-4-mi aalajangersakkat erngup nukinganik nukissiorfiit taakkununngalu atortulersuutit sorliit siunnersummi pineqarnerannut tunngapput. Tamanna pillugu inatsimmi aalajangersakkat taakkulu pillugit nassuaatit innersuussutigineqarput.

Sanaartukkanik erngup nukinganik iluaquteqarlunilu nukissiorfinnik pioreersunik allilerinernik atortulersuusersuinernillu aningaasalersuineq:

§§-ni 5-imi aamma 6-imi aalajangersakkat suliniutit aningaasalersorneqarnerannut kiisalu sanaartornissaannut, aningaasalersornissaannut ingerlanneqarnissaannullu namminersortumut imaluunniit namminersortunut arlaqartunut isumaqtigisiissuteqarsinnaanermut Naalakkersuisunut piginnaatisissuteqarnermut tunngapput, tak. §§-it 1-4. Tamanna BOT-imi isumaqtigisiissuteqarnissamut periarfissiivoq.

Aalajangersakkat allat:

Nuummut pilersuisussatut aammalu Qasigiannguanut Aasiannillu pilersuisussatut erngup nukinganik nukissiorfissat atortulersuutaat ilanngullugit nunat tamalaat akornanni suliariumannittussarsiuunneqarsinnaanerannik aalajangersagaq siunnersuutip § 7-ianut ilanngunneqarsimasoq siunnersummut nassuaatini allassimavoq. Nunat tamalaat akornanni suliariumannittuussarsiuussinikkut akit nunat tamalaat akornanni unammillersinnaassuseqartut anguneqarsinnaapput. Tamanna naammattumik sulisussaqarnissap qulakkeerneqarnissaanut kiisalu kinguaattoornerit akisunerulererillu pinngitsoortinnejarnissaannut peqataaqataasinnaavoq. Tamatuma peqatigisaanik nunatsinni suliffeqarnermi naammattumik sulisussaqarnissap qulakkeerneqarnissaanut tamanna peqataaqataasinnaavoq. Taamaalillunilu

nunat tamalaat akornanni suliariumannittussarsiuussinermi sanaartornermi neqerooruteqartitsarneq pillugu Inatsisartut inatsisaat atorneqassanngilaq.

Nunamut tamarmut pilersaarummi peqqussutit, pinngitsaaliisummik taarsiissutitalimmik pigisanik aalaakkaasunik arsaarinnitarneq aammalu naqissusiinikkut akitsusigassaatitaannginneq pillugu aalajangersakkat §§-ni 8-9-mi aamma 10-mi takuneqarsinnaapput.

Siunnersuutip Inatsisartunit siullermeerneqarnera

Siunnersuut una partiinit tamanit inersuarmi tapersorsorneqarpoq aammalu Inuussutissarsiornermut Aatsitassanullu Ataatsimiititaliamit suliarineqartussanngorlugu innersuunneqarluni.

Tusarniaaneq

Tusarniaaffigineqartut oqaaseqaataat tiguneqartut Naalakkersuisunit issuaavigineqarput oqaaseqaateqarfingineqarlutillu. Naalakkersuisut oqaaseqaataat ataatsimiititaliamit tusaatissatut tiguneqarput tusarniaanerullu ingerlanneqarneranut ataatsimiititaliaq allanik oqaaseqaatissaqanngilaq.

Ataatsimiititaliap siunnersummit suliarinninnera

Siunnersuut matumani pineqartoq nangaassuteqanngitsumik taperserneqartoq ataatsimiititaliamit maluginiarneqarpoq aammalu siullermeerinninnermi oqaaseqaatigineqartut ikummatissat atorlugit nukissiornermut taartissatut unammillersinnaasumik siunnersuutip mingutsitsinnginnerusumik nukissiornissamut pitsaasumik kingunerisassai tunnganerupput. Nukimmik ataavartumik nunatta imminut pilersornerata annertusinissaanut, avatangiisinut iluanaarutaanissa kiisalu CO₂-mik aniatitsinerup apparnissaanut siunnersuutip peqataaqataanissa pingaartinneqarpoq.

Erngup nukinganik nukissiorfiit imminut napatittumik ineriartortitsinissamik FN-imi anguniakkat nunatsinnit eqquutsinnejarnissaannut peqataaqataanermik saniatigut nukissiuutinut akinik ungasinnerusoq isigalugu akikinnerulersitsisumik siunissamut qulakkeerinnittumik attaveqaateqartitsinikkut innuttaasunut pitsaasumik sunniuteqarnissaat naatsorsuutigineqarpoq.

Taama isiginninnerit naliliinerillu ataatsimiititaliamit isumaqatigineqarput. Taakku aalajangiiffigisassatut siunnersummut (UKA2019/153) 2019-imi ukiakkut ataatsimiinermi akuerineqartumut akerliunnginnerisa saniatigut siunnersummi § 1-imut aamma §§-inut 2-4-mut ataatsimiititaliaq allanik oqaaseqaatissaqanngilaq.

Nunat tamalaat suliariumannittussarsiuussinerni neqerooruteqarsinnaanerat, nunamut tamarmut pilersaarummi peqqussutit, pinngitsaaliisummik taarsiissutitalimmik pigisanik

aalaakkaasunik arsaarinnittarneq aammalu naqissusiinikut akitsuusigassaatitaannginneq pillugu aalajangersakkat §§-ni 7-imi, 8-9-mi aamma 10-mi ilanngunneqarsimapput. Aalajangersakkanut taakkununnga, Nuummi aamma Ilulissani nunanit tamalaanit mittarfiit kiisalu Qaqortumi nunap immikkoortuani mittarfiup sananeqarnissaannut, ingerlanneqarnissaannut aningaasalersorneqarnissaannullu killiliussatut piumasaqaatit pillugit Inatsisartut inatsisaanni nr. 4-mi, 22. november 2018-imeersumi aalajangersakkanut assingusunik siunertaqartunut, ataatsimiititaliaq annertunerusumik oqaaseqaatissaqanngilaq.

Siunnersuutip aningaasaqarnikkut allaffissornikkut kingunerisassai kingunerisassallu allat pingaarutillit.

Inuiaqatigiinnut kingunerisassanik naliliineq, siunnersummut aningaasatigut tunngavinnik nassuaataasoq, siunnersummut ilanngullugu Naalakkersuisut saqqummiuppaat. Tamatuma saniatigut aningaasaliissutissat taakkununngalu aningaasalersuutissat annertunerat pissutigalugit apeqquit arlallit akissuteqarfijeqqullugit Naalakkersuisut ataatsimiititaliamit qinnuigineqarput. Isumaliutissiisummut matumunnga ilanngussaq innersuussutigineqarpoq. Naalakkersuisut nassuaataat akissutaallu ataatsimiititaliamit tusaatissatut tiguneqarput. Pilersaarutit aningaasatigut sulisussatigullu taama annertutigisut nunarsuarmi aningaasaqarnerup nikerarneranit sunnerneqarsinnaapput, tamatumani pineqarlutik aningaasalersuinermi aningaasartuutit, atortussanut aningaasartuutit aammalu sulisussat pisariaqartut sulisussarsiariniarnerat. Suliniutnik suliariumannittussarsiuussineq sanaartornermut aningaasaqartuutinik qanoq ittunik inerneqassanersoq siumut eqqoqqissaartumik eqqoriarneqarsinnaanngilaq. Taamaattumillu suliariumannittussarsiuussinissami piumasaqatit tamatumalu kingorna isumaqatigiissutit imarisassaasa Naalakkersuisunit sukumiisumik isumaliutigineqarnissaat pingaaruteqarpoq, taamaaliornikkut suliniutip taama angitigisup suliarineqarnerani saqitsaassutaasinnaasut isumagineqarnissaannut ersarissumik ataatsimoortumillu tunngaveqarnissaq qulakkeerneqarsinnaaqquillugu.

Ataatsimiititaliap inassuteqaatai

Ataatsimiititaliap isumaqatigiittup siunnersuut **akuersissutigineqassasoq inassutigaa.**

Taama oqaaseqarluni isumaliutissiisummilu alassimasutut paasinnilluni ataatsimiititaliap siunnersuut aappassaaniigassannngortippaa.

Marianne Paviaisen

Siulittaasoq

Lars Poulsen

Siulittaasup tullia

Knud Mathiassen

Harald Bianco

Charlotte Pike

Aslak Wilhelm Jensen

Karl Tobiassen